

andava a Ferrara e si dicea le zente dil papa veniva contra Ferrara. *Item*, erano do galie armate, una di le qual per forza è una fusta et 5 altre in hordine. *Item*, a Ruigo non è zente, et in Ferrara è pochi cavalli. *Item*, a la Boara è *solum* provisionati 22, etc. E dito capitano torna a l' Anguilara. E nota dito Donado da Leze portò le lettere questa note al principe e lol fe' meter in presom, poi questa matina leto le lettere fo cavato e donatoli s. 40, acciò andasse in Campo.

293* *Di sier Hieronimo Sovergnan, date a Venzon, a dì 18.* Chome inteso l' aviso a bocha inimici andavano verso la Chiusa, si messe in hordine con zente et quelli di Venzon fe' 50 fanti, over homeni, e andò a certo passo et vete 300 quali erano reduiti vicino a la Chiusa et visto non feno altro. *Etiam* lui è tornato a Oxopo. *Item*, à ricevuto il solfere e salnitro, ringratia la Signoria e li opererà in servigi nostri, etc.

Et per Colegio li fo scritto una lettera laudandolo assai.

Di Padoa, di rectori e provedador Barbaro, di 19. Come vanno quelli reperi e fortificationi, voriano guastatori di Trivisana, etc. per poter continuar ditti reperi.

Fo leto uno capitolo, mandò Piero di Bibiena in Colegio; come à per uno parti mo terzo zorno di Bologna, come ha di Milam si mandava 150 lanze verso Belinzona, perchè sguizari voleano passar, et che il gran maistro era partito di Campo et andato a Milam. *Item*, questa nova si ha *etiam* per milanesi e Hieronimo Dada venuto, et era andato per far le exequie di suo barba cardinal Roan, et che a Lion erano faliti banchi.

Fo leto una lettera, scrive il signor Chiapin Vitello da la Rivetta apresso Piove di Sacho, data eri a Piero di Bibiena, zercha il suo andar in Campo e aspeta la compagnia zonzi e de li soi fanti e voria danari, etc. Fo chiamà in Colegio el ditto Piero di Bibiena e ditoli scrivi a ditti Vitelli.

Di Arbe, di sier Alvise Badoer, quondam sier Rigo, di 13. Manda una lettera, li ha scritto in risposta quel baron ungaro sottoscrita Francesco Berislo de Brabaria *perpetuus comes de Dobor*, data in Castro Duvorischia, li scrive vol li danari li e non vol dar piezeria et à fede et è signor, et che 'l re di romani lo vol a so stipendio.

Et iterum per Colegio fo scritto al ditto Badoer repatriasse.

Di Antivari, di sier Vincenzo Zen, podestà et capitano, di . . . mazo. Zercha certa provision

data a uno Stefano che la Signoria nostra è stà inganata e nara la cossa *ut in litteris*.

Noto. In questa matina fo dito, *incerto auctore*, che le zente ispane soto il ducha de erano zonte in sul ferarese, *licet* lanze 400, et cussi fu vero come poi se intese.

Item, il conte Piero Monochovich è in Campo andò verso Vicenza, prese 20, morti alcuni et à vagnà 50 cavali di 300 li vene contra, come per le lettere particular se intese.

Noto, fo mandato in Campo ducati 5000.

Da poi disnar fo Consejo di X con la zonta di 294 danari e fo riconzà la parte di eri, di 11 zenthilomeni stagino in pregadi fino li sarà restituidi i soi danari potendo scontarli in le angarie che si meterà da uno anno in la, et fo azonti do altri con questo medemo muodo:

Sier Jacomo Donado, *quondam* sier Piero, da San Pollo.

Sier Domenego Contarini, *quondam* sier Bertuzi, da Santi Apostoli.

Fu *etiam* preso di dar a tre fie di Piero Vampo solito andar patron di nave, qual fo mandato per i cai di X a brusar l' armada a Ferrara e zonto fo scoperto da uno suo compagno et fo dal ducha fato apichar: che a dite sue fie li sia dato provisiom ducati 6 al mexe di la camera dil Consejo di X. *Item*, una caja di bando da li procuratori, di le prime vacante, e ducati 150 per una per suo maridar, e cussi chome si mariderano cessi la provisiom *pro portione*.

Di Citadella. Fono lettere di sier Gregorio Pizamano, provedador, di quelle occorentie, etc. e di Moncelese dil provedador Marzello, etc.

È da saper in questo Consejo di X, fo leto una suplication et oblation dil conte Filippo de Rossi ch'è in prexom et promete dar in suo cambio tutti li zentilhomeni sono in Alemagna presoni et dar piezaria di ducati 20 milia et esser lassato in libertà, *tamen* nulla fu fatto.

Consejo di X in questo mexe con la zonta.

Consieri.

Sier Andrea Corner.

Sier Alvise di Prioli.

Sier Hieronimo da Mulla.

Sier Nicolò Donado.

Sier Alvise Capello.

Sier Francesco Bragadin.